

08/07/1997

Konsert KRU pukau peminat di Ipoh

UNGKAPAN We Want KRU! We Want KRU! bergema di segenap pelosok Stadium Tertutup Indera Mulia, Majlis Bandaraya Ipoh (MBI) sepanjang tiga jam konsert KRU Megatour 1997, Sabtu lalu.

Meskipun dilanda pelbagai masalah sebelum ini, KRU tidak menjadikannya satu halangan untuk menampilkan persembahan hebat di hadapan 3,500 penonton yang menyaksikan konsert itu.

Konsert itu yang lebih mengutarakan konsep nostalgia, seakan-akan membawa penonton mengimbas kembali lagu popular KRU bermula dari album Canggih (1992) sehingga Krumania yang diterbitkan tahun ini.

Persembahan dimulakan tepat jam 9 malam apabila Elite muncul sebagai pembuka tirai konsert KRU dengan mempersembahkan lima lagu hits mereka termasuk Tak Tahu, Catwalk, Mungkin Belum Kau Rasa, Manisnya Senyumanmu dan GIG.

Selain berjaya membuktikan kemampuan KRU menyanyi secara live, Elite turut menampilkan persembahan mantap termasuk menyelitkan unsur tarian yang cukup menarik.

Penonton tidak bosan menyaksikan persembahan itu dan tidak berganjak langsung daripada tempat masing-masing malah turut sama-sama menari mengikut rentak muzik.

Suasana stadium juga tidak hambar kerana pancaran lampu berkelauan dan rekaan pentas yang menarik dengan penggunaan tiga probe menaikkan mood penonton malam itu.

Keadaan menjadi gamat seketika tepat pada jam 9.30 malam apabila KRU yang berpakaian ala-banduan muncul dengan lagu Awas, Mengerti, Di Dalam Dilema dan Freaky G.

Diikuti lagu Janji Tinggal Janji, Aneh, Sendiri, Salah Siapa, E Nuff Ezz E Nuff, Untukmu, 2, You Make My Day, Negatif, Semuanya OK dan Ohh! La La yang menyaksikan KRU berpakaian ala The Beatles.

Selain itu, mereka turut menyanyikan koleksi Maniamedley yang mengandungi lagu KRU Is Wild, Go KRU, 2020, Getaran Jiwa dan Fanatik bagi mengakhiri persembahan mereka tepat jam 11 malam.

Namun, keadaan menjadi sunyi seketika dan penonton seolah-olah bertafakur sejenak apabila ketua kumpulan KRU, Norman Abdul Halim membacakan profil Seniman Agung tanah air, Allahyarham Tan Sri P Ramlee sebelum menyanyikan lagu Getaran Jiwa.

KRU yang turut dianggotai Yusry dan Edry Abdul Halim kelihatan bersemangat ketika menyanyikan lagu 2020 yang secara tidak langsung menggambarkan sokongan mereka terhadap wawasan itu hasil cetusan ilham Perdana Menteri, Datuk Seri Dr Mahathir Mohamad.

(END)